

PRIMA PARTE

POESIA SCHERZOSA E SOCIALE

LU ROGGIU CHI CAMINA A SBATTULUNA

Lu tegnu stu ralogiu pi fiura
chi mai viu moviri nna sfera,
mi vinni nta lu vrazzu li dulura
sbattennu u pusu, ma nun c'è manera.
E mancu pigghia corda pi svintura
è cosa di jttallu ncatunera,
chistu rralogiu mi fa sempri un'ura
è comu chiddu di mala vannera.

A sta matina, mentri chi scinnia,
faccia cu stu vrazzu sfirriati,
tanti pirsuni curriri viria
verso la mè vota spavintati
dicennu: chi nfuddiu lu zù Ntria
o l'assartaru l'api sciamati?,
talà, mischinu, comu spatulia.
Ci dissi: un c'è nenti, nun vi scantati,

siti spavintati, mi nn'accorgiu,
sbattuliava p'avarari u rroggiu.

Mi dissiru cu ll'occhi spavintati:
p'un tintu rroggiu fa' sti cosi strani
chi v'è facennu sti gran sbattuliati
a fari spavintari li cristiani?
Lu viri quantu genti atturniati?,
cu sinn'iu a sunari li campani,
cu v'è currennu pi tilifonati,
c'arrivaru puru amiricani?

Chistu rralogiu lu ivi a'ccattari
pi viriri l'urariu a lu scuru,
ma s'un camina, dissi, chi nn'affari?,
e lu sbattivu nterra, vi lu giuru...
pigghia e viu li sferi rimirari,
truvai lu sicretu, v'assicuru.
Difatti pi stu rroggiu caminari
ogni minuto l'anchiappari a muru.

Misu nto lettu, cu lu vrazzu nuru,
sbattuliavi nna nuttata nteri,
a lu mè latu mè muggheri puru.
Ora sintiti chi mi v'è ssuccheri:
taliannu lu rroggiu cu lu scuru
vitti chi si firmaru arrè li sferi,
jettu nna vrazzata pi lu muru
e nchiappu nta la facci a mè muggheri...

Agghiorna e ncontru a mè cumpari,
sempri cu stu vrazzu susu e ghiusu,
comu mi vitti lu viu firmari
dicennumi: c'aviti lu nirvusu?,
siddu è lu rroggiu chi vi f'è dannari
megghiu chi lu jttati agghiri iusu
datu chi spissu si viri firmari
comu lu sceccu, chiddu ristiusu.

Chista è nna vita c'un putiti fari,
Vi dici giustu Turiddu Scutera
chi quarchi vota ssu vrazzu vi cari
facennu notti e ghiornu sta carrera.
Ma chissi nun s'è rroggia d'accattari,
purtatilu di cursa a ddi cu era:
aviri un rroggiu senza caminari
è nna vriogna puru pi la rera.

Penzu e la mè menti mi macina
si nta stu ralugiaru iu c'i'agghiri,
ma iennuci la cosa si cumina:
o sordi o lu rralogiu chi p'è ghiri...
Megghiu iri a caccia ssa matina...
Ma viri quant'è grossu stu spiaciri:
nun sulu lu rralogiu c'un camina
ma penzu li ottantamilaliri!

L'accattavi chistu rroggiu a rasteddu
senza garanzia mancu tantiddu,
fa lu battenti comu un murtareddu
l'orariu precisu... sempri chiddu;
pi caminari veramenti beddu
quannu caminu iu, camina iddu;
pi dari corda nun c'è puntareddu
stu firraru lu fici a testa d'iddu.

A cu mi lu vinniu mi rivorgiu
e nun vogghiu sèntiri cchiù nenti,
nun parramu cchiù di stu rralogiu
nni passanu li jorna cchiù cuntenti.

LU SURCI DI TANJI SUPRANU

La scenza sanitaria nn'avanza
e Vattiata tanti cosi penza,
v'à penitra nta cosi di mpurtanza
di fari cu li surci spirienza.
Li spezii nfilati nta la panza,
di nculu po' cusutu cu prudenza
lu surci arraggia, facennu la danza,
muzzica e struri la sò discinnenza.

Vattiata và ffa stu spirimentu
cu Ciccio Di Filippi misu accantu
e Gaspari Lombardu a lu mumentu
faccia d'apprintista ncontrabbantu.
Afferranu lu surci cu gran stentu
facennuci lu culu n'atru tantu
e po' nfilaru nta ddu funnamentu
li spezii e vva trova puru quantu.

Lu culu ci cuseru cu lu spau,
poviru armalu, ssà quantu suffriu.
Appena Vattiata l'acchiappau
nta li sò manu forti lu strinciu
e Di Filippi l'avugghia affunnau
finu a chi lu funnu si rumpiu,
prima chi di cusiri accampau
lu surci nta li manu ci muriu.

Vattiata nn'avia di doveri
lu surci nun duveri maltrattari,
strincennu forti la testa e li peri
appuntu chi lu fici suffucari.
Cca sutta li mè irita guerreru,
dicennu, vecchiu mè nun po' scappari
e cu stu versu e sti mali maneri
lu surci si finiu di campari.

Nun si pò Vattiata cunurtari
chi la sò fama avanti nun pò ghiri,
ddu surci c'avia tantu arraggiari
datu chi morsi un si potti sapiri.
Stu spirimentu nun si potti fari,
n'appi currivu chi nun si cci criri;
ci dissi Di Filippi: m'ascusari,
prima chi teni surci t'astruiri.

Tu mittisti lu surci a lu muriri
chi l'affucasti cu li tò tinturi;
dici Vattiata: nun mi l'addiri
chi lu facisti tu lu veru arruri,
ca cùsicci lu culu nun ti firi
cusisti sempri pi vintiquattr'uri,
e morsi priluncatu di suffriri
mputennu suppurtari lu duluri.

Ci dissi Di Filippi: m'accusati
senza sapiri chi cosa dicitu
e comu sunnu nternu l'apparati
ma d'upirazioni chi sapiti?,
basta l'internu essiri arritati
c'è tanti avvinimenti c'un capiti;
pi comu foru già li risurtati
ci'à scoppiatu la piritoniti.

Ora dici Lombardu: chissu è nenti,
ti cuminissi di tirari avanti
e prepararari autri strumenti
pi sviluppari cosi cchiù mportanti.
Ci l'ai la purtata veramenti
di fari cchiù miraculi di santi,
ti nni po' iri nta ddu continenti
a fari di lu cori li trapianti.

Di cca ti porti cosi ntrissanti,
tutti li sorti di li firramenti:
vugghioli, saccurafi, filu e nguanti,
pòrtati puru rincigghia valenti;
Savalli, lu firraru, sull'istanti
ti duna la tinagghia cu li renti,
Barnaba ti lu pari pi davanti,
D'Antona ci fa' fari l'assistenti.

Pi la visera dda, nni lu sparù,
portati puru lu filu di l'oru
di chiddu grossu chi ghinci lu sboru;
quannu chi cusi cu lu puntaloru
tu t'attrizzari bonu, Ciciu caru,
e portatillu n'altu manggaloru
picchè d'attrizzi nn'è essiri raru,
unn'av'aviri nuddu di ssu moru.

Rispunni Vattiata, ardituliddu:
a sentiri sti cosi mi ncipuddu,
ma c'av'affari ssu mastru Sariddu
unn'avi a ghiri a tagghiari mazzuddu,
ca sunnu tagghi a filu di capiddu
ch'è rafanella tagghia lu pizzuddu
cu veramenti lu nterventu d'iddu
stati sicuri c'unni campa nuddu.

Lumbardu nun ci dari di sti mpicci,
megghiu c'un ci lu metti nta sti ntucci.
Ci dici sempri Ciciu: mettiticci
ci tiri la petra e poi t'ammucci,
dùnaci pi davanti cosi spicci
a massimu nfirmieri cu Pitrucci
si lu nterventu è d'iddu sù pasticci:
fannu la stessa fini di du' surci.

Vulissi, pi cuntari stu tinuri,
la bedda menti di l'Abati Meli,
dicissi di stu surci li turturi
chi nta nna botta fici amaru feli.
Parrassi sempri di stu prufissuri,
la sò mastria portari a li celi.
Ancora dicu chi gran cusituri
v'è cusi di lu culu a lu giseli.

Cusia comu fussiru saccazzi,
nfuti li punta quasi parmarizzi
e cu di punti nni fici ntrallazzi
cchiù di mitati li punti fintizzi
passannu la mità cu ddi puntazzi
si vittiru li primi scusutizzi;
cusia la vugghiola cu du' lazzi
comu fussi cusiri cannizzi.

Chi li spezi nculu ci cuseru
dicu la viritati, vi lu giuru,
si ci ssu cosi chi nun sunnu veru
lu mè varagnu ci l'aviri puru.
Chi lu surci poi lu sippilleru,
di st'atra cosa nni sugnu sicuru,
anzi, p'un s'attaccari di qualeru
lu mpirtusaru dintra di lu muru.

Puru cu cassa fatta su misura
poi lu strapurtaru cu la vara,
la misiru nvitrina pi fiura
pi nna gran cosa storica cchiù rara.
Ci vannu li turista e profissura,
nni vennu puru di Massa Carrara,
a Rausia c'è la sipertura
e misu mprima fila a palummara.

L'AUTISTA DI BRUCA

L'autista di Bruca, diligenti,
sannu guidari boni tutti quanti;
li Sciuti sunnu a postu veramenti,
Vitu Birnardi, Li Russi, Marcianti
Capizzi, Agosta, Nasu putenti,
l'amiricanu, coppula mpurtanti.
C'è puru Paci, lu megghiu, cchiù scenti
nuddu ci metti un peri davanti.

Comu lu sò muturi è cuminatu
miccanicu nun c'è chi si fà scenti:
li pistuna d'azzaru timpiratu
lu stessu tuttu l'atru rimanenti;
cu l'assestu tuttu ribassatu
p'un dârici lu ventu mpirimenti,
nta la muntata a muturi astutatu
sduna strisciannu comu lu sirpenti.

Avi sta cincuentu tanti mmischi,
teni lu stemma di l'antichi Truschi,
roti quatрати cu li freni a dischi
aggiscinu a gittoni... cosi nfuschi;
paracaduti p'unn'aviri rischi
cu carruzzaria contru li muschi
quannu frena si sentinu li frischi
chè cinculata comu su li rrischi.

Marti lanciau li dischi vulanti,
nunn'è di stu pianeta stu talentu
e dunnì vennu unni facemu vantì;
la stronomia scanusci stu purtentu
ed ora ci nni fazzu propacanti;
stronami cu à statu vi presentu
quannu viriti dischi spazianti
è Don Vicenzu cu la cincuentu.

A Birtuzzu mi l'avìa scurdatu
lu megghiu autista arrinisciutu,
sutta l'incidenti un ci à ncappatu
mai pi strata ssicci' à trattinutu.
Puru cu muturi scunucchiatu
dunni à vulutu iddu à junciutu,
però di veri tracci l' à lassatu
di roti e di sportelli c' à pirdutu.

Muntati li scinnuti Bertu sfità,
e sduna a tutta cursa a bassa cota
nun penza a quarchi mala riuscita
comu capitau l' altra vota:
currennu lu circuni si cci sbita
e n'atru cupirtuni si cci sbota;
nzumma, abbriviannu la partita,
junciu a Palazzolu cu nna rota.

Machini nni cancia deci ogn'ura,
l'Alfa Rumeo cu la Bianchina
nun bastanu di Fordi li mutura
chiddi tedeschi pi nta li pinnina.
Era cu nna silestra fin'antura
ora ci nni viù n'atra virdina
e ci scummettu c'avanti chi scura
ci nni viremu n'atra mirrina.

LA SEICENTU PI LU MATRIMONIU

La scenza è ghiunta assai avanzata
si tratta supraffari la natura,
vitti nna nova machina nvitata
chi parti ad acqua di bbiviratura;
nni pigghia centu litra a l'avarata,
n'atri ducentu p'ogni quartu d'ura
e tutta chidda chi ncontra pi strata
p'aviri la sò iuta cchiù sicura.

Camina cu la fatta di la luna,
nna cosa veramenti ntrissanti,
avi du' fari comu du' biduna
d'un granni rifritturi luminanti.
Fici scummissa cu la cufuruna,
vinci la cursa pi du' metri avanti,
la tartaruca persi pi sfurtuna
picchi appi ntall'occhi l'abbaglianti.

Vitti n'atru furguni cchiù mpurtanti,
mai l'avia vistu sti spaventi,
lu taliu di darrè e di davanti,
chi mostru era, nun capivi nenti.
L'elica nchianu chi batti a livanti,
lu sterzu tortu versu lu punenti,
ci trovu nna forti simigghianti
a la tantazioni veramenti.

E lu pilota senza la patenti,
però ben'attrizzatu pi guidari,
casu chi ci succeri l'incidenti
lu corvu certamenti pò vulari.
C'è lu nostromu usu bastimenti
varda lu puntu dunn'av'abbuccari,
lu chianciu a Sarvaturi mè parenti
lu curvacchiuni si duna da fari.

Lu faru c'addumatu ciav'a stari,
picchi li fila sù tutti aggruppati;
l'abbaglianti nun si pò abbassari,
s'avi a staccari dannuci runcati.
Cu si ci ncontra si viri allampari,
di notti è disastru nta li strati,
lu faru punta li stiddi pulari
cusà si l'Astri nun fussiru abbitati.

E li missili foru superati,
sti mezzi d'ora pigghiaru li carti,
pi astrunavi foru prinotati
e pi la luna lu furgoni parti.
Pi la secentu fissaru li dati,
dumani è nta lu pianeta Marti,
si nunn'arriva pi difficutati
significa c'un c'è acqua nta ddi parti.

A mia sta secentu un mi garbau,
mi nn'addunai comu chi partiu,
nta un viaggu tantu ci mpiegau
chi cchiù d'un annu e passa si nni iu.
Mè figghiu pi stu tempu c'aspittau
dissi: a me patri, chi ci succiriu?
Ma dopu l'annu chi si maritau
arrivamu poi pi lu vattiu...

LU CANCIU DI LI ZAPPUNA

Quannu ti strichi dunnì c'è spuntuna
pecura tu perdi peddi e lana.
Nardu cu Turi canciaru zappuna
Turi voli la junta ma nun c'è ana,
lèvacì manu cu li Castigghiuna
picchè sù torti di nesciri rana.
Stu canciu fu pi Nardu la furtuna
Turiddu mpiccicau nta la frana.

Turi nun fari ridiri senz'ana
chi stu sinzali ti porta furtuna
nun tira acqua pi la tò funtana
picchè viremma di li castigghiuna,
ti fa davanti la parti baggiana
affaccia, codda comu fa la luna
e ti l'à ddiri, sì nna milinciana
picchè ti metti cu sti marpiuna.

Duranti chi canciaru li zappuna
Turiddu li macagni li viria
ma quannu s'avi cunta cu mmrugghiuna.
Narduzzu cuminava la bugia.
Ni ru cuminciatu di runnuna
di quannu c'appizzatu lu tinia
e tutti ddi valanchi e ddi timpuna
era carattaristica c'avia.

Turiddu, stu zappuni, ci dicia
mi pari fussi manciatu di crapi
e Nardu, chiovu tortu, rispunnia:
camina, nun canusci mancu rrapì,
quannu stu zappuni nun l'avia
ncapu ci pusaru un sciamu d'api
e parsi l'usu di nna magarià
ma sta cchiù chi sicuru nun si rapi.

Ma pi sapiri chistu fattu bonu
m'informu cu fìrrara di Milanu,
risurta ch'è spaccatu di lu tronu
sardatu cu la lava di vurcanu.
Quant'eranu priati di lu ntonu
ora dispiaciuti ch'è luntanu
ti l'à purtari macari a lu sonu
basta c'un ti lu levi cchiù di mmanu.

Ora parramu di l'atru zappuni,
chiddu di Turiddu chi canciau,
chi ora l'avi Nardu Castigghiuni.
Appena l'appi iddu lu cunzau,
a taliallu paria bidduni
ma cu la virità nun risurtau
picchè di dintra c'era un gran fuchiuni
a cu tincisti tu, ti nramagghiau.

M'informu puru cu la fabbricau
a tutti li fìrrara chi ci spiu
nun sannu quali mastro lu stampau,
mancu di quali fabbrica nisciu.
Ma assira Carrapipi m'infurmau,
sannu ddu mastro chi lu costruìu
fu fattu di buatta chi truvau
e ddi la data nun si nni capiu.

Di ssu zappuni vinni la disfatta
sta cunzatina d'ora nun risurta,
tutta dda gran forma bedda fatta
ora è divinuta tanta brutta.
Nun c'è marruggiu nta ll'occhiu
[c'appatta,
un'ala canniata e l'atra rutta,
puru la sò caruta nunn'è esatta
appena scoppa nterra ci ributta.

Leti di stu canciu assai pirfettu,
eranu sti zappuna ferru ruttu,
nna lira nun ci vannu, ci scummettu,
pi l'unu cchiù di n'atru quant'è brutto.
Nardu chi si lu curca nta lu lettu
ci veni nzonnu e si lu vasa a curtu;
a festa si lu portanu a brazzettu
annu cuntintizza, beni e tuttu.

L'OMU AVARU

Iò parlu di l'avaru e tu, natura,
di l'omu nsaziabili criari;
nna vita amara, dispirata e dura
supra sta terra chi ci porti a fari
chi mancu si nn'adduna quannu scura?
La notti, iornu la vulissi fari,
privannusi di tuttu si trascura
pinzannu sulu e sempri d'aggranfari.

Avaru, sì lu stessu di lu mari,
ricivi sempri e un si inchi mai;
all'universu vulissi arrivari
ti danni l'arma e nati nta li guai.
Tu, chiù pusseri, cchiù voi acquistari,
peggiu d'un dispiratu ti nni stai.
Tu criari ca lu munnu arriritari
e ancora chi si mori tu nun sai.

Fai l'avaru ca chissu t'attira,
sdilliriu, scuntenti, pecchi spissu
e mancu duni a poviru nna lira
ed anzi spurpi sanu puru a chissu.
Ti pigghianu pi mostro cu t'ammira,
puru nimicu di lu Crucifissu,
vai a finiri, quannu si fà sira,
nta la casa d'infenu, nta l'abbissu.

Chissu ti dicu e m'arringraziari,
dicennu virità nun t'aiu offisu;
si voi lu nostru sistema sulari
pigghialu, nun mi diri dunn'è misu.
Dannatu mori, nun c'è cchiù chi fari
quannu Satana ti porta l'avvisu;
nuru nascisti, nuru arriturnari
chi ti porti un tappu malu misu.

L'ACIDDAZZU DI PERDI-JURNATA E LU CACCIATURI

Lu cacciaturi viri nn'aciddazzu
— Talà dunn'è pusatu, pari un Niu —
ci v'è calatu darrè d'un murazzu;
l'aceddu vola e viri dunn'iu
e curri n'atra vota com'un pazzu
chi pi la prescia macari cariu...
Nna jurnata di scappa e strapazzu
e l'aceddu, tra vola e posa, si nni iu.

A ME MATRI

(Poesia che ha conseguito il primo premio)

Mamma chi sulu mamma numinari
sentu nto cori n'amurusu arduri;
mamma, palora chi fa cunsulari
puru lu nostru supremu Signuri.
Mamma, lu cori mi sentu spustari
quannu m'arrassu di li tò caluri.
Mamma, surgenti chi nun pò sciucari
fatta d'affettu, fidiltà e amuri.

Duluri quannu a luci mi mittisti,
quantu sforzi e sururi tu virsasti
mamma, cu lu tò sangu nni nutristi
cu stentu e cu fatica n'allivasti.
Mamma, chi pi nui quantu suffristi
tutta la vita tò sacrificasti
la cchiù forti amuri nni mittisti
tutti li suffirenze ti scurdasti.

Stintasti cinu figghi nta sta vita,
priseni sulu iò di sta casata,
nta lu tò cori regna nna firita
passi li jorna sempri ngustiata.
chiancennu li to figghi ogni ghiurnata.
Mamma, quannu sì morta e sippillita
di diri « figghi » la tò cuitata.